

fo deputato vadi a la custodia di Feltre el qual è in questa terra per aver dita soa expedition etc.

*Di Campo, fo leto una lettera di 11, di domino Jannes di Campo Fregoso a Piero di Biebena suo secretario qui et olim dil conte di Pignano.* Avisa lui medemo aver preso quel borgognon.

*Di domino Lucio Malvezo fo lettere date in Campo a San Bonifazio.* Zercha i butini di Lignago etc. *ut in litteris.* Nulla da conto.

Fo dito che a la Dieta era zonto il ducha Federico di Saxonia e do altri electori, li qualli *publice* hanno dito non voglino guerra con la Signoria di Venexia, el qual aviso si ave per via di todeschi, chome sier Alvise da Molin savio dil consejo disse in Colegio.

Da poi disnar fo consejo di X con la zonta et fu fato sier Marin Morexini l'avogador de comun sopra li presoni sono qui et con lui si trati di contracambiar prima si vengi a render et relassar niuno, acciò non si fazi più come è stà fato. Et balotono alcuni zenthilomeni si haveano messo a la pruova de andar sopracomiti prestando a la Signoria ducati 1500 chome fu preso, et passò *solum* 10, et do non passò *videlicet* sier Luca Loredan fo patron al trafego *quondam* sier Francesco et sier Daniel Pixani di sier Vetor, et quelli rimaseno sono qui sotto notadi. Et è da saper fu terminato che a hordine, chome qui sotto scripto, dovesseno armar sichè ne habiamo fin qui 13 sopracomiti dil Consejo di X, et volemo do altri e non piu.

*Dieci sopracomiti rimasti nel Consejo di X.*

Sier Sabastian Tiepolo fo sopracomito, di sier Jeronimo el consier.

Sier Francesco Corner di sier Zorzi cavalier procurator.

Sier Giacomo Michiel fo patron in Fiandra, *quondam* sier Jeronimo.

Sier Justo Guoro fo sopracomito, *quondam* sier Pandolfo.

Sier Thomaso Tiepolo di sier Francesco, cao dil consejo di X.

Sier Nadalim Contarini fo patron in Fiandra, *quondam* sier Lorenzo.

Sier Vicenzo di Prioli di sier Lorenzo, *quondam* sier Piero procurator.

Sier Piero Valier fo cataver, *quondam* sier Antonio.

Sier Marco Bragadin fo sopracomito, *quondam* sier Piero.

*Li tre primi rimasti.*

Sier Lunardo Emo, *quondam* sier Zuan el cavalier. Sier Michiel Morexini savio ai ordeni, di sier Piero el consier.

Sier Piero Antonio Falier fo proveditor sora l'armar, *quondam* sier Thomà.

*Di Campo, di 12, hore prima di note date a San Bonifazio.* Vidi lettere di sier Piero Marzello proveditor zeneral a sier Bernardo Donado *quondam* sier Zuane. Ozi habiamo consumado in consulti, e poi andati fino a Soave a veder alozamenti per restrenzer queste zente e retirar le zente d'arme qui, tutte si 'l sarà possibile. Per nostri che vien de verso Brexa et Milan intendemo se fazeva mostre a le zente d'arme, et che mandavano a Brexa molti pezi d'artelarie dove favevano condur ferri. *Item*, che mandano in Franza, et ha conduti a Milan, 25 cittadini, tra li qual sono alcuni Gambareschi, Avogari et de altre molte caxe, et haveano comandato molti guastadori, 12000, parte di qualli erano gionti a Valzeo et Peschiera, divulgavase per voler trazer l'Adexe del suo alveo per tuor l'acqua a Lignago, *tamen* molte volte i danno fama di una cossa et fa un altra, judicho li guastadori a gran gionta non saranno tanti come si dize.

*Di Verona.* Habiamo la causa del suo ussir eri fuora cussi grossi, esser processo per haver inteso per certe sue spie come noi con tuto questo exercito eramo retrati per andar a la volta del Friul a socorer le gente nostre, che de li erano rote, che dimostra i habino pezor spie di le nostre. *Dicesi etiam* che Frachasso non è stà mandato in Alemagna, et che erano per rilasarlo, ma che lui non volle la sua liberta se non li era dato in le mane cui l'havea incolpado, che non lo credo a niun modo. Noi per hordine di la illustrissima Signoria mandamo dimane a li passi dil visentino Maldonato spagnolo con provisionati 200, et alcune de queste nostre lanze spezate a obedientia dil proveditor di Schio, ch'è sier Jeronimo da cha' da Pexaro di sier Fantin, per segurar quelli passi et conforto di quelli populi.

Nota. Eri se intese esser venuto in questa terra uno messo di uno merchadante todescho a tuor lettere di passo per uno merchadante todescho vien con 500 some di merze in questa terra per vender baratar e contratar, le qual lettere subito le ave, perchè fu preso in pregadi farli ogni largo salvoconduto.